

al-Masīh Par Īmān

Yih Kyā Hai?



al-masīh par īmān: yih kyā hai?

What Does it Mean to Believe in al-Masih?

by Bakhtullah

[Ao, Khud Dekh Lo 24]

(Urdu—Roman script)

© 2024 www.chashmamedia.org

published and printed by

Good Word, New Delhi

The title cover is derived from waldryano <https://pixabay.com/illustrations/resilience-victory-force-1697546/>.

Bible quotations are from UGV.

for enquiries or to request more copies:

askandanswer786@gmail.com

Fahrist

Īsā Masīh ko Haqīr Mat Jāno	2
Kufr ke Bure Natije	4
Apnā Īmān Chhipāe Mat Rakho	6
Nūr Pākar Tārīkī se Bacho	7
Use Dekhte Raho	9
Us kī Sunte Raho	10
Injīl, Yūhannā 12:37-50	14

Jab Īsā Masīh ākhirī bār Yarūshalam men dākhl huā to us kā purjosh istiqbāl huā. Log kḥushī manāne lage. Unheñ lagā ki Īsā Masīh bādshāh bankar dushman ko mulk se haṭā degā. Lekin us ne aisā na kiyā. Us ne unheñ batāyā ki merī rāh halīmī kī rāh hai. Is ke bād wuh chhip gayā. Yoñ us kī khul-e-ām kḥidmat iḥtitām par pahuñchā. Us waqt se wuh sirf apne shāgirdoñ ke mahdūd dāyre men tālīm dene lagā.

Is se pahle ki Yūhannā yih ākhirī bāteñ pesh kartā hai wuh Masīh kī āmad kā maqsad aur kalām thoṛe lafzoñ men dohrātā hai.

► *Yūhannā is jagah par yih kḥulāsā kyon pesh kartā hai?*

Yūhannā hameñ sāf dikhānā chāhtā hai ki
Īsā Masīh par īmān kyā chīz hai. Pahlī bāt,

Īsā Masīh ko Haqīr Mat Jāno

Īsā Masīh ne yih tamām ilāhī nishān logoñ ke
sāmne hī dikhāe. To bhī wuh us par īmān na
lāe. Kitnī barī tragedy! Us ne itne mojize kar
dikhāe the, to bhī aksar log īmān na lāe. Sab
us kā kalām sunkar dang rah jāte the. Un ke
dīnī rāhnumā to is tarah kī bāteñ nahīñ karte
the. To bhī aksar log īmān na lāe.

► *Īmān na lāne kī kyā wajah thī?*

Īmān na lāne ke pīchhe ek rūhānī haqīqat thī.
Sadiyoñ pahle Yasāyāh Nabī farmā chukā
thā ki

Ai Rab, kaun hamāre paighām par
īmān lāyā?

Aur Rab kī qudrat kis par zāhir huī?
(Yūhannā 12:38; Yasāyāh 53:1 se)

► *Is ke pīchhe rūhānī haqīqat kyā hai?*

Aksar log Ẹhudā ke kalām par īmān nahīn lāeṅge.

- *Jab log us kā kalām haqīr jānte haiṅ to kyā Ẹhudā ko is se koī farq nahīn paṛtā?*

Use zarūr farq paṛtā hai. Yūhannā, Yasāyāh Nabī kā hawālā lekar farmātā hai,

Allāh ne un kī āṅkhoṅ ko andhā
Aur un ke dil ko be-his kar diyā hai,
Aisā na ho ki wuh apnī āṅkhoṅ se
dekheṅ,
Apne dil se samjheṅ,
Merī taraf rujū kareṅ
Aur main unheṅ shafā dūṅ.
(Yūhannā 12:40; Yasāyāh 6:9-10 se)

- *Jab koī Ẹhudā kā kalām haqīr jāntā hai to Ẹhudā kā kyā jawāb hai?*

Ẹhudā hone detā hai ki aisā shaḡhs rūhānī bātoṅ ke lie itnā andhā aur be-his ho jāe ki wuh āindā shāyad hī taubā karke rūhānī shafā pāe.

- *Yūhannā logon kā kufr kyon itnī saḡhtī se pesh kartā hai?*

Wuh nahīn chāhtā ki ham Īsā Masīh kā kalām aur kām haqīr jānane se us najāt se mahrūm rah jāen jo Īsā Masīh ke wasīle se miltī hai. Āge wuh kufr ke bure natījon par aur zor detā hai.

Kufr ke Bure Natīje

Yūhannā farmātā hai ki

Yasāyāh ne yih islie farmāyā kyonki us ne Īsā kā jalāl dekhkar us ke bāre meñ bāt kī. (Yūhannā 12:41)

- *Yasāyāh Nabī to kāī sadiyon pahle mar chukā thā. Us ne kis tarah Īsā Masīh kā jalāl dekh liyā thā?*

Yūhannā kā kahnā hai ki Ḳhudā aur Īsā Masīh kā jalāl ek hī hai. Jahān Ḳhudā bāp hai wahān Ḳhudā beṭā bhī hotā hai. Jab nabī ne royā meñ Ḳhudā kā jalāl dekhā to us ne Īsā Masīh kā jalāl bhī dekhā.

Yon Masīh kā jalāl nabī par zāhir huā. Tab Ḳhudā ne farmāyā ki merā paighām sunākar tū logoñ ke diloñ ko be-his kar ḍālegā. Nabī ne pūchhā ki main kab tak kalām sunāūñ? Use jawāb milā ki us waqt tak ki mulk ke shahr wīrān-o-sunsān, us ke ghar ḡhairābād aur us ke khet banjar na hoñ (Yasāyāh 6:11). Yih peshgoī nabī ke jīte-jī pūrī huī: Isrāīl barbād huā aur qaum muḳhtalif mulkoñ meñ tittar-bittar huī.

► *Yūhannā is hawāle se kyā kahnā chāhtā hai?*

Jis tarah Isrāīliyon ne Yasāyāh Nabī kā kalām rad kiyā thā usī tarah aksar logoñ ne Īsā Masīh kā kalām rad kiyā hai. Yasāyāh Nabī kā paighām rad karne se logoñ ke dil rūhānī sachchāiyon ke lie andhe ho gae aur natīje meñ pūrā mulk tabāh huā. Isī tarah Īsā Masīh kā kalām rad karne se logoñ ke dil rūhānī sachchāiyon ke lie andhe ho gae aur bād meñ pūrā mulk barbād huā, be-shumār

Yahūdī muḵhtalif mulkoñ meñ tittar-bitttar hue.

- *Kyā āp samajhte haiñ ki Īsā Masīh ek azīm nabī hai aur bas?*

Yih kāfī nahīñ hai. Is se najāt nahīñ milegī. Is se āp gunāh ke bure natījoñ se nahīñ bacheñge. Is se āp Ḳhudā kī nazar meñ mañzūr nahīñ ho jāeñge, āp jannat meñ dāḳhil nahīñ ho pāeñge.

Lekin Yūhannā hamēñ ek aur qism kī be-īmānī se bhī ḳhabrdār rakhnā chāhtā hai. Wuh farmātā hai ki

Apnā Īmān Chhipāe Mat Rakho

Pūrī qaum ne to Īsā Masīh ko rad nahīñ kiyā thā. Kāfī log us par īmān rakhte the. Kuchh rāhnumā bhī un meñ shāmil the, hālāñki wuh dūsroñ ke bāis yih bāt khule taur se nahīñ kahte the.

- *Yih rāhnumā kyoñ khule taur se nahīñ kahte the ki ham īmān rakhte haiñ?*

Yūhannā farmātā hai ki wuh nahīn chāhte the ki unheñ Yahūdī jamāt se nikālā jāe. Wuh Allāh kī izzat kī nisbat insān kī izzat ko zyādā azīz rakhte the.

► *Is se ham kyā sīkhte haiñ?*

Un logoñ jaise mat bano jo īmān to lāe the phir bhī yih bāt chhipāe rakhte the. Jab ham apnā īmān chhipāte haiñ to ham Īsā Masīh ko dukh pahuñchāte haiñ. Yūhannā farmātā hai ki yih nahīn chalegā ki tum Allāh kī izzat kī nisbat insān kī izzat zyādā azīz rakho.

Ab tak Yūhannā ne khule taur se īmān rakhne par zor diyā. Lekin Īsā Masīh par īmān hai kyā? Is kā jawāb wuh ab detā hai. Pahle,

Nūr Pākar Tārīkī se Bacho

Īsā Masīh ne farmāyā,

Main nūr kī haisiyat se is duniyā
meñ āyā hūñ tāki jo bhī mujh par
īmān lāe wuh tārīkī meñ na rahe.
(Yūhannā 12:46)

- *Nūr kā andhere par kyā asar hotā hai?*

Jahān nūr kī tez raushnī phailtī hai wahān andherā dūr ho jātā hai. Jis ke dil mein nūr basne lage us se andherā dūr ho jātā hai.

- *Nūr kis tarah miltā hai?*

Īsā Masīh par imān lāne se. Wuh ḵhud nūr hai.

- *Us par imān kyon itnā ṭhos hai (āyat 44)?*

Islie ki use Ḵhudā bāp se bhejā gayā hai. Jo us par imān rakhe wuh Ḵhudā bāp par imān rakhtā hai.

Ġharz, Īsā Masīh Ḵhudā bāp se bhejā gayā nūr hai, aur sirf use pāne se insān tārīkī se bachegā. Yon pahlā qadam yih hai ki ham ilāhī nūr yānī Masīh ko pākar us se bhar jāen.

- *Ham kis tarah yih nūr pā sakte haiñ?*

Īsā Masīh aur us kā kalām qabūl karne se. Tab yih nūr hamāre andar phailne lagtā, chamakne-damakne lagtā hai.

Dūsri bāt,

Use Dekhte Raho

Īsā Masīh ne yih bhī farmāyā,

Jo mujhe dekhtā hai wuh use dekhtā
hai jis ne mujhe bhejā hai.
(Yūhannā 12:45)

► *Ham kis tarah Īsā Masīh ko dekh sakte hain?*

Īmān lāne se wuh hamāre dilon meñ basne lagtā hai. Tab ham īmān meñ use dekh sakte hain. Aur use dekhkar ham Ḳhudā bāp ko bhī dekh sakte hain.

► *Ham Masīh ke zariye Ḳhudā bāp ko kyon dekh sakte hain?*

Islie ki wuh Ḳhudā kā nūr hai jo is duniyā meñ bhejā gayā tāki hamen raushan karke bachāe. Ḳhudā bāp sūraj jaisā hai jabki Īsā Masīh us kī raushnī hai, us kā nūr jo is duniyā meñ ā gayā hai. Ham sūraj ko sirf nūr ke zariye dekh sakte hain.

► *Ġharz īmāndār ko kyā karnā hai?*

Use bas Masīh ko dekhtā rahnā hai jo nūr hai. Masīh ko dekhne se us kī zindagī nūr aur pākīzagī se bhar jāegī. Tīsri bāt,

Us kī Sunte Raho

Insān apnī āñkhoñ se dekhtā hai. Dekhne se wuh Ḳhudā kā nūr pātā hai. Ab Īsā Masīh sunane kī bāt bhī chheṛtā hai: Insān apne kānoñ se suntā hai, tab jawāb meñ chalne lagtā hai. Īsā Masīh ne farmāyā,

Jo merī bāteñ sunkar un par amal nahīñ kartā main us kī adālat nahīñ karūngā, kyonki main duniyā kī adālat karne ke lie nahīñ āyā balki use najāt dene ke lie. To bhī ek hai jo us kī adālat kartā hai. Jo mujhe rad karke merī bāteñ qabūl nahīñ kartā merā pesh kiyā gayā kalām hī qiyāmat ke din us kī adālat karegā.
(Yūhannā 12:47-48)

Ham bahut kuchh sunane ke ādī ho gae haiñ. Hamāre hukmrān baṛe baṛe wāde karte haiñ

jo bād meñ adhūre rah jāte haiñ. Internet ke daur meñ har ek ne apne āp ko achchhī tarah pesh karnā sīkh liyā hai. Har ek ne dūsroñ ko manwāne kā gur apnā liyā hai.

Bahut kuchh sunane meñ ātā hai jo ham sīdhe tāq par rakhkar bhūl jāte haiñ. Aur sach kaheñ, agar aise na karte to bār bār māyūs ho jāte. Islie zarūrī hai ki ham Masīh kī hidāyat par dhyān deñ ki merī suno. Matlab hai merī bāteñ sunkar un par amal karo. Jis ke andar nūr hai wuh khud baḡhud us kī suntā rahegā. Wuh yih bāteñ mahfūz rakhegā, aur un kā us kī zindagī par gahrā asar paṛegā.

Īsā Masīh kī bāteñ tāq par rakhkar chhoṛeñge to samajh lo ki āp nahīñ bacheñge.

► *Āp kyon nahīñ bacheñge? Kyā Īsā Masīh ne nahīñ farmāyā thā ki main adālat karne nahīñ āyā?*

Zarūr. Bāt yih hai ki us kā kalām hī āp kī adālat karegā. Us kā kalām rad karne se āp kī adālat ho chukī hogī.

- *Lekin kyā ham us kī sārī bātoñ par amal kar pāenge? Kyā kuchh na kuchh adhūrā nahīn rahegā?*

Be-shak. Bāt yih nahīn hai. Amal karne ke pīchhe jo Yūnānī lafz hai us kā matlab mahfūz rakhnā bhī hai. Amal karne kā pahlā qadam Masīh kī bāteñ apne dil meñ mahfūz rakhnā hai. Jab ham nūr kī dhūp señkte rahte haiñ to us kā kalām bhī hamāre dil meñ baiṭhkar phal lātā hai. Baṛī bāt yih nahīn ki ham har bāt par pūre utreñ. Baṛī bāt yih hai ki Īsā Masīh jo hamārā nūr hai hamāre andar base aur apnī bāteñ harkat meñ lāe. Wuh hamārā azīm ustād hai, aur wuh jāntā hai ki ham us ke kamzor shāgird haiñ. Baṛī bāt yih hai ki wuh hamārā hāth thāme sāth chale.

► *Kyā nūr āp ke dil mein basā huā hai? Kyā wuh āpkā hāth thāme āp ke sāth chal rahā hai?*

Yon Yūhannā hamein āgāh kartā hai ki Īsā Masīh ko haqīr mat jāno balki us par imān lāo. Aur yih imān chhipāe mat rakho. Kyonki Īsā Masīh **Nūr** hai, aur nūr kī fitrat yih hai ki wuh phail jāe.

► *Imāndār ko kyā karnā hai?*

- Pahle, use dekhte raho tāki us kā nūr āp mein phailtā jāe, āp mein chamaktā-damaktā rahe.
- Dūsre, us kī āwāz sunkar us kī rāhon par chalte raho. Sab se barī bāt yih ki us kā hāth thāme rakho. Tab jannat kī rāh yaqīnī hai.

Haqīqat mein Īsā Masīh par imān sab se mushkil aur sab se āsān kām hai.

► *Us par imān sab se mushkil kām kyon hai?*

Jab ham us ke shāgird ban jāte hain to wuh chāhtā hai ki ham apnā imān chhipāe na rakhein. Sāth sāth wuh chāhtā hai ki ham us

kī rāh par chaleñ. Matlab hai muhabbat kī rāh par. Halīmī kī rāh par.

Lekin us par īmān sab se āsān kām bhī hai.

► *Us par īmān sab se āsān kām kyon hai?*

Hameñ sirf us par īmān lānā hai jo nūr hai. Tab wuh hamāre andar phailkar hameñ apnī muhabbat se bhar degā, hamārā hāth thāme hamāre sāth chalegā. Adālat ke din jab us kā kalām hamārā sāmna karegā to hameñ koī nuqsān nahīn pahuñchegā, kyonki hamāre andar basne wālā nūr hameñ bachāe rakhegā. Wuhī hameñ jannat tak pahuñchāegā.

Injīl, Yūhannā 12:37-50

Agarche Īsā ne yih tamām ilāhī nishān un ke sāmne hī dikhāe to bhī wuh us par īmān na lāe. Yoñ Yasāyāh Nabī kī peshgoī pūrī huī,

Ai Rab, kaun hamāre paighām
par īmān lāyā?
Aur Rab kī qudrat kis par zāhir
huī?

Chunānche wuh īmān na lā sake, jis tarah
Yasāyāh Nabī ne kahīn aur farmāyā hai,

Allāh ne un kī ānkhon ko andhā
Aur un ke dil ko be-his kar diyā
hai,
Aisā na ho ki wuh apnī ānkhon
se dekhen,
Apne dil se samjhen,
Merī taraf rujū karen
Aur main unhen shafā dūn.

Yasāyāh ne yih islie farmāyā kyonki us ne
Īsā kā jalāl dekhkar us ke bāre mein bāt kī.
To bhī bahut-se log Īsā par īmān rakhte the.
Un mein kuchh rāhnumā bhī shāmil the.
Lekin wuh is kā alāniyā iqrār nahīn karte
the, kyonki wuh ḍarte the ki Farīsī hamen

Yahūdī jamāt se ḵhārij kar deṅge. Asl meṅ wuh Allāh kī izzat kī nisbat insān kī izzat ko zyādā azīz rakhte the.

Phir Īsā pukār uṭhā, “Jo mujh par īmān rakhtā hai wuh na sirf mujh par balki us par īmān rakhtā hai jis ne mujhe bhejā hai. Aur jo mujhe dekhtā hai wuh use dekhtā hai jis ne mujhe bhejā hai. Main nūr kī haisiyat se is duniyā meṅ āyā hūn tāki jo bhī mujh par īmān lāe wuh tārikī meṅ na rahe. Jo merī bāteṅ sunkar un par amal nahīn kartā main us kī adālat nahīn karūṅgā, kyonki main duniyā kī adālat karne ke lie nahīn āyā balki use najāt dene ke lie. To bhī ek hai jo us kī adālat kartā hai. Jo mujhe rad karke merī bāteṅ qabūl nahīn kartā merā pesh kiyā gayā kalām hī qiyāmat ke din us kī adālat karegā. Kyonki jo kuchh mainne bayān kiyā hai wuh merī taraf se nahīn hai. Mere bhejne wāle bāp hī ne mujhe hukm

diyā ki kyā kahnā aur kyā sunānā hai. Aur
main jāntā hūn ki us kā hukm abadī zindagī
tak pahuñchātā hai. Chunāñche jo kuchh
main sunātā hūn wuhī kuchh hai jo bāp ne
mujhe batāyā hai.”